

Ang Dalan Sa Saad Miliko Paingon Sa Egipto

KATUYOAN: Sa paghatag ug kasaysayan sa kaagi sa Israel nga may kaambitan kang Cristo.

Nakalantaw na ba ikaw pinaagi sa teleskopyo? Kon nakasulay ka, imong makita ang mga butang nga atua sa halayo. Karon atong ihinagbo ang usa ka tawo diha sa *DALAN SA SAAD* kang kansang kinabuhi sama sa teleskopyo. Pinaagi sa iyang kasinatian atong makita ang atua kaayo sa halayo diha sa *DALAN SA KINABUHI* ngadto sa panahon ni Cristo ug bisan lapas pa ngadto sa *GINGHARIAN*. Ang mao nga mga katawhan gitawag nga mga 'simbolo' tungod kay naghulagway na sila pag-una sa mga butang nga nanghitabo. Kining mao nga tawo, si Jose, naghulagway sa kahimtang sa Ginoong Jesu-Cristo ug sa mga pagtagad sa iyang mga kaigsoonan, ang mga Judio, sa dinhi pa Siya sa kalibutan.

Gihigugma ni Jacob si Jose labaw sa tanan niya nga mga anak tungod kay siya gianak sa iyang pagkatigulang ug kang Rachel, ang iyang pinalabi nga asawa. Iyang gibuhatan siya ug usa ka sinina nga nagakalainlain ang bulok [nagpaila nga talahuron] nga maoy hinungdan nga si Jose gikasinahan sa iyang mga igsoon.

Usa ka adlaw gisugo ni Jacob si Jose pag-adto sa Sichem aron pagsusi sa kahimtang sa iyang mga igsoon. Dihadiha ang iyang mga igsoon nagsabutsabut sa pagpatay kang Jose tungod sa iyang bag-o nga saput ug sa kasina nga gihambin sa ilang mga kasingkasing. Busa nagkauyon sila nga ibutang si Jose diha sa halalum ug mamala nga atabay ug suginlan na lamang nila ang ilang amahan nga si Jose patay na. Sa dihang ila na unta nga himoon kini nga plano, dihay nagsingabut nga usa ka panon sa mga Ishmaelihanon nga mga magpapatigayon padulong ngadto sa Egipto. Gibaligya nila si Jose sa kaluhaan ka buok nga salapi. Gidala siya ngadto sa Egipto ug gibaligya nga ulipon ngadto kang Potiphar.

Si Jose buotan ug kasaligan nga sulogoon ug wala danti ug dugay nahimo siya nga tinugyanan sa balay ug bahandi ni Potiphar. Apan gikasinahan na usab siya sa asawa ni Potiphar ug gitumotumoan siya aron mabanlud sa bilangoan. Samtang didto sa bilangoan, aduna siya'y duha ka mga kauban, ang magbalantay sa vino sa hari ug ang magbubuhat sa tinapay. Nagdamgo sila sa usa ka damgo nga talagsaon us: si Jose pinaagi sa panabang sa Dios gihubad niya ang maong damgo. Ang usa pagapatyon ug ang usa pagabuhian ug ibalik sa iyang trabaho. Ang mao nga mga damgo nanghitabo ug nangatuman sumala sa hubad ni Jose. Usa ka gabii si Faraon, ang hari sa Egipto, nagdamgo, ug ang magbalantay sa vino nahinumdom kang Jose ug gisuginlan niya si Faraon mahitungod sa paghubad ni Jose sa iyang damgo nga natuman. Gipakuha ni Faraon si Jose ug gihatag niya ang husto nga hubad sa damgo ni Faraon ug ingon nga ganti gihimo siya nga gobernador sa tibook kayutaan sa Egipto.

Ang damgo nga gihuhad ni Jose nagpahibalo sa daku kaayo nga gutom sa kayutanan sa Egipto ug kini nanghitabo gayud. Tungod niini nga damgo ang mga katawhan sa Egipto nagaandam ug daghan kaayo nga mga inakaon ug daghan nga mga trigo ang nahipos diha sa mga dapa. Natigom kini sa katuigan sa kadagaya.

Gipaadto ni Jacob ang iyang 10 ka mga anak ngadto sa Egipto aron sa pagpalit ug trigo. Gikinahanglan nga moyukbo sila sa atubangan ni Jose aron papaliton sila sa trigo ug ang ilang mga panimalay maluwas sa gutom. Sila wala mahibalo nga kini mao ang ila nga igsoon nga ilang gibaligya. Wala sila makaila kang Jose apan si Jose nakaila kanila. Gisulayan sila ni Jose aron sa pagsula kon aduna bay kausaban diha kanila human siya ibaligya nila. Basaha ang kapitulo 44-45 sa Genesis aron imong mahibaloan ang mao nga mga pagsulay nga gihatag ni Jose sa iyang mga igsoon. Sa katapusan napamatud-an nga sila nagbasol sa ilang mga kasingkasing ug dihadhiha gipail ni Jose ang iyang kaugalingon ngadto sa iyang mga igsoon. Atong mapamalandongan ang mga paghilak ug kalipay sa ilang nahibaloan nga siya mao diay ang ilang igsoon! Gipakuha ni Jose ang iyang amahan ug banay aron mopuyo sa Egipto. Ang Dios nagsaad nga panalanginan Niya si Jacob sa Egipto (Genesis 46:3-4) ug dad-on ang iyang kahwatan pag-usab sa pagpanaw diha sa **DALAN SA SAAD** ngadto sa Yuta sa Saad.

Ato na karon nga tan-awon pinaagi sa teleskopyo. Sa makapila nga higayon ang kasinatian ni Jose sama sa kasinatian ni Cristo?

1. Sila pulos pinatangga nga mga anak - Mateo 3:17.
2. Sila pulos matinumanon sa kabubut-on sa Amahan - Juan 8:29.
3. Sila pulos nagsul-ob sa saput nga halangdon; nagkalainlain ang mga bulok - walay tinahian - Juan 19:23.
4. Sila pulos miadto sa pagtabang sa ilang mga igsoon - Lukas 19:11; Juan 1:11.
5. Sila pulos gidumtan nga walay hinungdan - Juan 15:25.
6. Sila pulos gibaligya sa kantidad nga salapi - Mateo 26:15.
7. Sila pulos gitumotumoon pagsumbong - Mateo 26:60.
8. Sila pulos nahikalimtan; si Jose sa magbalantay sa vino; si Cristo sa kalibutan - Juan 1:10.
9. Sila pulos may mga kauban sa pagpa-ubos; ang usa nawala; ang usa naluwas - Lukas 23:32.
10. Sila pulos gibangon gikan sa gahong ug gibayaw - Filipos 2:9-11.
11. Sila pulos nagluwas sa mga katawhan gikan sa kamatayon ngadto sa kinabuhi - Juan 3:16; 1:12.
12. Sa katapusan sila pulos pagapasidunggan sa ilang mga kaigsoonan - Zacarias 12:10.
13. Sila pulos nag-andam ug mga butang alang sa ilang mga hinigugma - Juan 14:1-6; Roma 8:32.

Si Jacob ug si Jose namatay sa Egipto apan sila nangamatay na may paglaum. Patalinghugi ang mga pulong ni Jose: "Ako mamatay, apan sa pagkamatay, ang Dios magadu-awkaninyo..." Genesis 50:24-26. Ang Dios nga maoy nagamando diha sa **DALAN SA SAAD** dili mamakak ug dili gayud malimot sa iyang mga gisaad.

Kining mao nga Dios imo ba usab nga Dios? Siya maimo kon imo nga dawaon ang iyang Anak, ang Ginooang Jesu-Cristo nga imong Manuluwas ug diha Kaniya mabatonan mo ang mga maayo nga mga butang. Roma 8:32.

SAG-ULOHON : Roma 8:32 "Siya nga wala magpahigawas sa iyang kaugalingong Anak kondili mitugyan hinoon Kaniya alang kanatong tanan, dili ba ihatag usab Niya kanato ang tanang mga butang uban Kaniya?"

PAGTULON-AN 9 - PAGATUBAGON

Sa ubos gilista ang 9 ka mga kasinatian mahitungod sa atong Ginoong Jesu-Cristo. Sa ubos sa kada kinaiya ni Cristo, isulat usab ang mga kasinatian ni Jose.

1. Ang Ginoong Jesu-Cristo mao ang pinalanggang Anak sa Dios nga Amahan.

Mateo 3:17

Si Jose mao ang pinalanggang anak ni _____ Genesis 37:3.

2. Gibiyaan ni Jesus ang kalangitan aron lamang madad-an sa kalooy ang iyang mga kaigsoonan, ang mga Judio. Juan 1:11.

Si Jose _____

Genesis 37:13.

3. Si Jesus gibaligya sa pipila ka salapi. Mateo 26:15.

Si Jose gibaligya sa kantidad nga _____

Genesis 37:28.

4. Si Jesus gidumtan nga walay hinungdan. Juan 15:25.

Si Jose _____

Genesis 37:5, 11.

5. Si Jesus may duha ka kauban diha sa kaulawan, ang usa ka kawatan nawala, ang usa naluwas. Lukas 23:32.

Si Jose usab may _____

Genesis 40:1-3.

6. Moabut ang panahon nga si Jesus pagapasidunggan sa iyang mga kaigsoonan, ang mga Judio, ug pagaharian sila. Zacarias 12:10.

Gipasidunggan si Jose _____ Egipto.

Genesis 45:26.

7. Si Jesus nagluwas sa daghan kaayo nga mga katawohan gikan sa kamatayon ngadto sa kinabuhing walay katapusan. Juan 3:16.

Si Jose nakaluwas _____

Genesis 41:56-57.

8. Si Jesus nag-andam ug mga maayo nga mga butang sa iyang mga hinigugma.

Roma 8:32.

Si Jose naghatag sa _____ damgo.

Genesis 41:11-12.

9. Si Jesus nabanhaw gikan sa lubnganan ug gibayaw ngadto sa toong trono sa Dios.

Filipos 2:9-11.

Si Jose gipagawas _____ ug gibayaw

Genesis 41:14, 41.

10. Isulat sa sinag-ulo ang Roma 8:32 _____
